


# Papur y Plwyf

Papur lleol electronig plwyf  
Llangynnwr – Llangynnwr's local  
electronic paper

Rhif wyth Hydref 2011

Bydd Papur Y Plwyf yn son am ddigwyddiadau a phersonoliaethau yn ein cymuned. Os ydych am dderbyn copi, anfonwch eich cyfeiriad e-bost at [papuryplwyf@hotmail.co.uk](mailto:papuryplwyf@hotmail.co.uk)

## Cwblhau Prosiect Amgylcheddol Plannu Coed



Y mae cynghorwyr y gymuned yn anfon copi o daflen amgylcheddol a gynhyrchwyd ganddynt i bob cartref yn y gymuned. Dengys y daflen yr ymdrechion a wnaethpwyd gan y cyngor i dorri lawr yr ôl troed carbon a dod yn ddi-garbon.

Mae'n dangos y mathau o goed a blannwyd ac yn disgrifio sut y byddant yn gwella'n cymuned. Plannwyd dros ddwy fil o goed a fydd yn tynnu'r carbon allan o'r awyrgylch ac yn helpu i frwydro yn erbyn cynhesu bydeang.

## Cadeirydd yn dweud y drefn wrth gynghorwyr

Ar ddechrau cyfarfod mis Medi o'r Cyngor Cymuned, cymerodd cadeirydd cyngor Llangynnwr y cam anarferol o ddarllen datganiad a baratowyd yn gynt, yn atgofio aelodau i barchu'i gilydd ac aelodau o gyrrff eraill sy'n dod i annerch y cyngor.

Yn ystod cyfarfod blaenorol y cyngor ym mis Gorffennaf, torrwyd ar draws aelod o'r Cyngor Sir a oedd yn adrodd am fesurau arafu traffig dros y blynyddoedd nesaf gan un neu ddau o gynghorwyr. Dywedodd un cynghorydd hŷn fod "cywilydd arno am ymddygiad ychydig o aelodau'r cyngor".

Cafodd sylwadau'r cadeirydd ganlyniad boddhaol ac nid oedd unrhyw sylwadau di-groeso na thorri ar draws yn ystod cyfarfod mis Medi.

## Ddim masnachwyr heb wahoddiad

Holir trigolion Lôn Penymorfa ym 24 Tachwedd 2011 i weld os oes angen parth tebyg yno.

## Llyfr Gwyn Caerfyrddin



Dyma Mererid Hopwood o Langynnwr yn lawnsio Llyfr Gwyn Caerfyrddin mewn Rali Heddwch o flaen neuadd San Pedr yn Sgwar Nott. Cefnogwyd y seremoni gan ddisgyblion hŷn o Ysgol y Frenhines Elisabeth ac Ysgol

Bro Myrddin ynghŷd â channoedd o bobl leol a sefodd yn amyneddgar i arwyddo'r Llyfr Gwyn yn galw am ddatrys anghydfod a gwrthdaro mewn modd heddwchlon. Arweiniwyd y seremoni gan faer y dref, Tom Defis a ddychwelodd o Mozambique yn ddiweddar lle cafodd ei gyflwyno â darn o gelf heddwch a wnaethpwyd allan o ddarnau o arfau a ddefnyddiwyd yn ystod eu rhyfel cartref a barodd 30 mlynedd.

Mae nifer o gymunedau dros Gymru wedi gwneud cais am fenthyg y Llyfr Gwyn er mwyn iddynt hwythau hefyd ychwanegu'u henwau yn yr alwad am heddwch ar hyd y byd.



**H.I. EVANS &  
FEIBION  
Llaethdy  
Penymorfa**



Llaeth Ffres Pasteuredig o'r Fferm  
Papur Newydd  
Hufen ac wyau ffres cludiant dyddiol  
Ffôn (01267) 236972  
Bwciwch eich twrci Nadolig  
lleol nawr!



MUDIAD YSGOLION MEITHRIN

## Cylch Meithrin Llangynnwr

Dydd Llun, Mawrth, Iau a Dydd  
Gwener (Mon, Tues, Thurs & Fri)  
**9.00 – 11.30** £2.50 sesiwn  
**Ysgol Llangynnwr**

## Meddygfeydd yr Heddlu

Bob Dydd Mercher ym  
Morrisons rhwng 15.00 &  
16.00.

Yn yr Aelwyd, Tregynwr,  
bob Dydd Llun rhwng  
16.00 & 18.00

### Gweithredu yn erbyn graffiti

Yn dilyn cyfres o fandaleiddio, rhoddwyd cyfweliad i fachgen 17 oed gyda'i dad gan yr heddlu. Cyfaddefodd yr oedolyn ifanc ei fod wedi chwistrellu negeseuon atgas ac adio'i "tag" i nifer o walydd yn yr ardal. Cyfeiriwyd y gŵr ifanc at y Tim Troseddu Ieuentid a bydd yn glanhau'r graffiti cyn ymddangos o flaen y llys ieuentid ym mis Hydref.

### Ysgolion Dysgu Gyrru'n gweithredu

Yn dilyn gweithredu gan aelodau

o'r Cyngor Cymuned, mae'r nifer o athrawon dysgu gyrru sy'n defnyddio'r ardal o amgylch y parc i ddysgu rifysio wedi gostwng yn sylweddol.

### Codi Fflag Eco yn yr ysgol

Mewn gwasanaeth arbennig yn Ysgol Llangynnwr, cyflwynwyd yr ail faner werdd i aelodau o'r Pwyllgor Eco gan Geraint Bevan o'r Adran Addysg. Canmolodd yr ysgol am eu gweithgareddau amgylcheddol.

### Merch leol yn cwblhau trywydd yr Inca dros elusen



Yn ddiweddar, cwblhaodd Nia Bevan o Langynnwr drywydd anodd yr Inca er mwyn codi bron i fil o bunnoedd ar gyfer elusen gancr Macmillan sydd yn agos iawn at ei chalon.



Pan gyrhaeddodd Machu Picchu ar ôl dau ddiwrnod o deithio caled, roedd yr haul yn codi a dywedodd Nia ei bod yn deall pam y mae'n cael ei alw'n un o Saith Rhyfeddod y Byd.

### Mwy o ddamweiniau ffordd

Mae'n ymddanos nad yw'r arwynebedd gwrth-sgidio ar waelod Rhiw Babel yn llwyddo i leihau'r nifer o geir yn gwrthdaro â'r pileri concrit o dan bont Pensarn. Mynegodd y Cyngorydd Elwyn Williams, a welir yn y llun isod, ei bryder am fod y palmant yn ran o'r ffordd ddynodedig, ddiogel ar gyfer digybllion sydd yn gorfod cerdded i Ysgol QE High ac Ysgol Bro Myrddin



Bydd y llun yma o hen bont rheilffordd Caerfyrddin o ddiddordeb i chi os ydych yn ffan o hen drenau stêm. Dymchwelwyd y bont a gysylltai Caerfyrddin â Llandeilo ac Aberystwyth yn y 70au ar ol cau'r trac yn 1963 ar ôl ychydig dros ganrif o wasanaeth.

### Canlyniadau Arolwg Y Parc

Yn dilyn arolwg gan Bapur y Plwyf ym mis Mai, codwyd y materion canlynol gan bobl sydd yn defnyddio ac sydd yn byw ar bwys y parc.

### Diogelwch

Yr angen i arafu'r cyflymder ar yr heol wrth y parc/ twmpathau cyflymder/ cyfyngiad cyflymder o 20mya.

Angen gwneud y man chwarae ar gyfer plant bach yn fwy diogel/ rhy rhwydd i fabanod adael y man chwarae â ffens/ cysylltiad tarmac o'r llwybr i'r man chwarae.

Ardal di-gwn lle all plant chwarae heb gwmpo mewn i faw ci.

Mynediad i'r parc yn rhy gul ar gyfer rhai cadeiriau olwyn.

### Golwg y parc

Angen mwy o finiau i leihau sbwriel. Mwy o gysgod.

Mwy o lwyni lliwgar fel rhododendrons. Mwy o offer chwarae ar gyfer plant hŷn.

Nododd sawl atebwr fod angen cynnal a chadw rheolaidd er mwyn gwneud y parc yn fwy deniadol.

*Anfonir y sylwadau hyn at y Cyngor Cymuned er mwyn eu hystyried cyn dechrau gwelliannau.*